

Papí jimiárá chichamjai iwiáramu **shuar-apach chicham**

SERIE INFANTIL Y JUVENIL

Iberoamérica
Mamallactakunapa
Wankurí

Iberoamérica
Nunkannaya
Irunramu



Organización
de Estados
Iberoamericanos
Para la Educación,
la Ciencia
y la Cultura







Papí jímiará chichamjai iwiáramu
shuar-apach chicham

SERIE INFANTIL Y JUVENIL



Ministerio Coordinador
de Conocimiento y
Talento Humano



Ministerio
de Cultura y
Patrimonio



LA REVOLUCIÓN
CIVICA ESTA EN MARCHA

Iberoamérica
Mamallactakunapa
Wankurí



Iberoamérica
Nunkamaya
Iruntzamu

Organización
de Estados
Iberoamericanos



Para la Educación,
la Ciencia
y la Cultura



INPC
Instituto Nacional de
Patrimonio Cultural
Ecuador



Agencia Andaluza de Cooperación Internacional para el Desarrollo
CONSEJERÍA DE ADMINISTRACIÓN LOCAL Y RELACIONES INSTITUCIONALES

Rafael Correa Delgado

Presidente Constitucional de la República del Ecuador

Francisco Velasco Andrade

Ministro de Cultura y Patrimonio

Lucía Chiriboga Vega | Directora Ejecutiva

Instituto Nacional de Patrimonio Cultural

Delicio Toledo León | Director Regional 7 (e)

Instituto Nacional de Patrimonio Cultural

Directorio del INPC

Gabriela Eljuri	Subsecretaria de Patrimonio. Delegada del Ministro de Cultura y Patrimonio, Presidenta del Directorio del INPC
Diego Falconí	Delegado del Ministro del Interior
María Fernanda Espinosa Garcés	Ministra de Defensa Nacional
Richard García	Delegado del Presidente de la Conferencia Episcopal Ecuatoriana
Raúl Pérez Torres	Presidente de la Casa de la Cultura Ecuatoriana
María Inés Rivadeneira	Delegada del Presidente del Consejo de Educación Superior - CES

Organización de Estados Iberoamericanos - OEI

Natalia Armijos Velasco	Directora y Representante Permanente de la Oficina Nacional Ecuador Organización de Estados Iberoamericanos
Sara Jaramillo Idrobo	Coordinadora de Proyectos Organización de Estados Iberoamericanos
Lorena Salcedo Carrión	Coordinadora del Proyecto “Desarrollo de las capacidades y potencialidades productivas, emprendedoras y de buena vecindad en la frontera peruano-ecuatoriana” Organización de Estados Iberoamericanos
Carlos Castillo	Técnico de Cultura del Proyecto “Desarrollo de las capacidades y potencialidades productivas, emprendedoras y de buena vecindad en la frontera peruano-ecuatoriana” Organización de Estados Iberoamericanos

ISBN: 978-9942-955-00-5



9 789942 955005

Coordinación Área Patrimonio Cultural Inmaterial

Cristina Bustamante | INPC – Regional 7

Coordinación Editorial

Elena Noboa Jiménez | Directora de Transferencia del Conocimiento

Conceptualización y elaboración de la guía

Yamanua María Juank Kajékai

Wilma Guachamín Calderón

Ana María Cadena Albuja

Cuidado de la edición

Wilma Guachamín Calderón

Ana María Cadena Albuja

Corrección de estilo

Juan Francisco Escobar

Validación de la guía

Ángel Domingo Naikiai Shiki

Margarita Cecilia Sando Hushpa

Kaikiat Ramón Ankuash Tsukanka

Marcia Esthela Antún Tiwiram

Traducción al Shuar

Ángel Domingo Naikiai Shiki

Producción

Regional 7 | Instituto Nacional de Patrimonio Cultural

Diseño y diagramación

Ricardo Novillo Loaiza

Fotografías

Archivo INPC

Archivo Histórico del Ministerio de Cultura y Patrimonio

Ilustraciones

Ricardo Novillo Loaiza

Impresión

Grafisum Cía. Ltda.

Tiraje 2000 ejemplares

Loja, 2013

ISBN 978-9942-955-00-5

**Convenio de Cooperación Interinstitucional
entre la Organización de Estados Iberoamericanos - OEI
y el Instituto Nacional de Patrimonio Cultural**



Iniakma

Iwianínamu	4
------------	---

Aujmatma 1

¿Yaitiaj nuyá tuí pujaj?	6
Tarimiat aents Shuar Samur Chinchipnum	8
Yauchuya aujmatsamu	10

Aujmatma 2

Shuar nuyá kampuntin	14
Arútam	16
Etsa	18
Janch nuyá Iwia	19
Chicham jintiamu yajasmajai	21

Aujmatma 3

¿Shuar warí takatna nájana iwiaku pujestsasha?	24
Nunkui nuyá shuar nunka arakmatai	26
Ánent	29
Kaya antishtai	31
Eamat	32
Namak níjjat	36
Ewejai najantai	37

Aujmatma 4

Yauchuya tsuakratin: uwishin, Tsuakratin nuyá antishtai arak	38
¿Yauchuya tsuakratin itiúra iwiarnawit: Uwishin nuyá tsuakratin?	40
Antishtai arak	42

Aujmatma 5

Shuar ijiamtutai	44
Napi ijiamtamú	46
Uwí ijiamtutai	47
Tsantsa ijiamtutai	48

Jintia iwiainiamuri

Aents matsamtainiam tuke aikiatai chichamjain jintiamu- junta tajai, yaunchuya aujmatsamu, nampet, etsertai nuyá – nekamtikiui turutskesh iímtikiui nunkan nuyá nekamtikiui anturnaiyamu ankannum pujamurin. Ju nekatainkia ii uuntri amasuitji tura tsawant nankamakar ajamunam iniankaki wenawai.

Warinkish ikiutai niniuriniak nekamu iistin, nakakmanuman 7, shuar uchin suawai Papí jimiárá chichamjai iwiáramu Shuar-Apach chichaman. Nankamas tuke aikiatai chichamjain jintiamun irutkamu uunnum Nankais nuyá Pakeshunm, Samur Chinchipnum pujuinian init achiakui.

Ju enentajai, shuar uchi nuwa nuya aishman, jintiamu papí jimiárá chichamjai iwiaramun yaunchuya aujmatai, nekas tama nuyá tarimiat aents shuar niniurink asa nekamtikia nuyá waramtiksatui, nekamatirai, enentaimsatin, nuyá najanatin niniuk aíniawai chikichjai apatka iismaka. Aní timian nekapsar yaitaj tusar pujusarminiaiti nuyá nukap niniuri najantai timian titiniaiti ii Ekuaturi achiakman.

Lucía Chiriboga Vega

Utsuin Umimtikin

Warinkish ikiutai niniuriniak nekamu iistin



Papí jimiará chichamjai iwiáramu Shuar-Apach chichamjai warinkish ikiutai niniuriniak nekamu, nakakmanum 7, Organización de Estados beroamericanos (OEI) yainmajai najanamu, shuar uchi nuwa nuyá aishman irutka uunt Nankais nuyá Pakeshnum pujuinian niniuriniak neka unuimiatnum yaimiui.

Ju jintiaka ewej aujimatman tarimiat aents shuar yaunchu nankamas mari timiantri achiakui, yaunchuya aujmatain, tuke aikiatai nuyá kashi kashinin najantairi. Aujmatma amuamunam, tuke aikiatai timian titiai, pujutai nuyá uunt wea tura chikich aents irutkamunmaya nekatairi ikusar kajinmatkishtin takat awai.

Jutikiar, wakerukmar uchi nuwa nuyá aishmantirmin, shuarna yaunchuya aujamatai nunkanmani ipiaman ewekamjarne, yajasma nekashmanumani nuyá yaunchuya tuke najantairi atumi niniuri nekatairi warirtin nuyá ju atumi pujutairin achiniai a wainkiatarme.

Delicio Toledo León

Nakakmanum utsuin 7 (e)

Warinkish ikiutai niniuriniak nekamu iistin

Aujmatma 1

¿Yaitiaj nuyá tui pujaj?

Tarimiat aents Shuarka
Ekuatura Ikiamri pujawai
Uunt matsatka. Muruna
Santiak, Samur Chinchip
nuyá Paastas matsatui.





Tarimiat aents shuar Samur Chinchipnum

Samur Chinchipkia Ikiámia uunt matsatkamunmayaiti, Ekuatura nunkantri pujawai, Piruanjai nunkan tesarnaiyawai. Nakanarui usumtai irutkamu uuntnum Samur, Chinchip, Nankais, Yantsas, Panki, Centinela del Cónedor, Palanda nuyá Pakesh.

Irutkamu Uunt Pakesh nuyá Nankaisnum nukap irutkamu wainiawai tarimiat aents shuar najanena. Aents nekápmarma uwí 2010-tin Pakeshnum 619 shuar pujuiniawai, Nankaiska 1371 tarimiat aents ainiawai.

Mai irutkamu uuntnumka aents takat natka najanena ju ainiawai nunka arakmat, waaka napampat, yawi takat nuyá ewejai takatai.

1. Nakumkamu iísam X apújsata tui irutkamu uuntnum pujam.



2. Irutkamu uunt naari aárta tarimiat aents
Shuar tuimpia pujuinia.

3. Enentaimsam nuyá nakumkatá pujamurmin urukuya yaunchu apachrum pujuyania nui,
yamai urukuit, urumai urukuk ati.

YAUNCHU

YAMAI

URUMAI

4. ¿Túa aínia itiurchat natka ame irutkamu
uuntrumin?


Yauchuya aujamatsamu



1 Shuar Ekuatur Ikiama pakari matsamaiti. Jatekratkamu tsawantia shuar mankartin tusa nekamuiti.



5 Arútam enentaimtin salesianos Macas, Wakis nuyá Mentes, juakar uchi init pujustin, unuimiakartin, uchi Arútma chichame nekawartinian najankarmiayi.



4 Uwí urumai 1850 nuyá 1920-tin, Arútma enentaintin franciscanos, salesianos nuyá dominicos shuar nunkan irasarmiayi. Franciscanos uchi init pujústianian Samurnum najanawarmiayi uwí 1892-tin.



2 Washim uwí XVII-tin, jesuitas tarmiyai shuara nunken nuyá Arút-ma etsertai jean Mainas najanawarmiyai, uunt matsatka Xevaros nunkajai tesarnaiyayai, nuinkia shuar matsatu armiayi.



3 Uwí 1550-tin Juan de Salinas Loyola nukap apach nunké wankantin najankarmiyai. Emka apachjai wajar-majainkia Logrono ashinramiyai uwí 1599-tin.



6 Uchi init pujustin jeamkaru ai, sumau, apach nuyá suntar tarmiyai. Tuma asamtai uwí 1964-tin Shuar Irunramu najanawarmiyai shuara nunké ayamrukarta-sa, jatekratkatkin chicham jusamu Ekuatur an emta asamtai.



- 1.** Apachrumjai, turutskesh apajai
aujmatsatá, tarimiat aents shuar
yaunchuya nékamu nuyá aujmatsamu
túa imía wakerukum.


- 2.** Chichamjai yawajrar nakurutainiam
aimratá chicham natka yaunchuya
aujmatsamu tarimiat aents shuarna.

Naka pee

1. Entsa naari shuar pujusma, inkas nuyá ispanianmaya kauntsain.
2. Ispanianmaya apach nunka matsatka naari Juan de Salinas Loyola najánamun Shuar ashirma.
3. Arútma enentaimtin shuar nunka nekawaru, washim uwí XVII-tin, jatekratma tsawantin.

Nakak

1. Tui Arútma enentaimtin franciscanos, Arútma chichame etseru jee najankaruit.
2. Arútma enentaintin aínia, Arútma chichame etseru jee shuar uchiniu najankaru.
3. Irunramu, shuar nunka wankanti ayamrku apach, surin. nuyá suntar kaunmanum.





3. Ame shuar anintrusam aimkiata:



¿Ya Arútma enentaimtinia ame irunktamu uuntrumin tarmia?

¿Warí takatna najanawarmia?

¿Apach, ame irutkarmin pujuinia tu nunkanmaya kaunkarmia? Warínia najanena?

¿Shuar penker pujustinian, Shuar Iruntramu warí takatna nájanu anturkaitiam?

4. Tarimiat aents shuar yaunchuri
yapájiakum, ¿Warín yapajiwaintiam
nuyá urúamtaí?

Aujmatma 2

Shuar nuyá kampuntin

Tarimiat aents shuarka
intiainiawai kampuntin
ikiamajai.





Mashi yajasma iwiaku nuyá jaká najanena wakantin ainiawai, nékashtai nunkanam matsatenawai.

Tsuakratin nuyá uunt wea íin ainiawai nuyá mash nunka íiyamu jintín aínia, taku tawai, í imtiairijai nunka mash itiur enentaintamuit pujamunam.



AUJMATSATÁ

¿Warí yaunchaya aujmatma antukuitiam wainchatai yajasmanu kampuniunam pujuinia?

Yaunchuya aujmatmanum nunka juarkimiu nuyá kampuniunam yajasma wainchatai, nekas tutain nuyá nii najantairi pachiniawai.



Arútam

Nekás shuar yauchuya aujmatai aents ti natkaiti. Antichtai tunanam pujuwiti nuyá Shuar, anentjai enentaimtin aíniawai. Arútmaka, iyashtchuiti nuyá nankamas wantiniuiti aents eatainmaka.

¿Shuarnum yáit Arútmasha? (Pénker apújtai)

Arútmaka nankamas wantiniuiti. Antíshai tunanam pujuwiti uunt wea etserin aíniawai, charpia anin, uunt yawá anin najanar wantinin tiniu aíniawai. Tijiuch pujaka kayash chichawiti kakarman achiaku asa. Arútmaka ikiakatniuiti.

Informante: Benito Ujukam Comunidad: Chichis



Antíshai tunanam Arútam untsutai

(Pénker apújtai)

Arútmaka entsa pujuwiti nuyá nunka wayawai tuna nuyá entsa waitirini. Uunt tunan irau aíniawai kakarman nuyá penker chicham jintiamun achiktasa. Uunt nemawiti aents tunanam wenakui, tura kashi tsankun mushutin turutskesh umin aíniawai Arútmajai inkinaikiatsa.

Nui, wea anentrinaiti Arútam wait anenrat nuyá seaman sukartusat tusa. Tunanam mainiar nuyá natenam umin aíniawai kayamrartasa. Nui Arútam máyaiya aní weaniuiti, chikichka janch uunt anin wainin aíniawai. Pisaka nukap tsawant pujuschatin tura yauchuya kakar apachri wainkiunka chicham jintiamun achiktatui. Amuakur, shintiarar wainkiamun aya wean ujau aíniawai nuyá íímiarmari, pujamurin Arútam wantinkiatu.



1. Ju aents etserainia nakumkatá *Arútman* nekáwaru turutskesh wainkiacharu.

Ame apachrum turutskesh wea

Yaunchuya tsuakratin turutskesh amekesh

2. ¿Urúamtai *Arútam* natkait Shuara
pujutairinchá?

3. ¿*Arútam* warí penker chichaman jintiamun
uchi aishmank nuyá nuwan ame uwí ani
achiakun sukartusain?



Etsa

Etsaka wakaniti, chinkin nuyá yajasman najantraiti, tura etsan iniakmawai. Shuaran eamkatniun, manitiae najankatniun, jeamtinian, yajasma arantuktinian nuyá mashì kampuntin sukartan jintiawai.

Etsa nuyá Auju (Pénker apújtai)

Etsa nuyá Nantu nuwa Aujui manitkiarmiayi. *Etsa, Nantun jiinium awati ukusturmiayi.* Etsa manitian awakmakmiayi tura kajek nayaimpiniam pujutsa wemiyai.

Yaunchu etsá naek nayaimpiya nunká achitrauyayi, aents irastasa wakamniauyayi. Anínt asa Auju, Etsan patatukmiayi chankinium chumpimia nuyá naeknumani nayaimpiniam wakamiayi. Etsa Kunampen akatar naekan tsupikmiayi nuyá Auju iniak chinki najanarmiayi. Chinki najanar nantu nankamar ajamunam tuke kuntutsnak jauijujujuuu! ajawiti.

Etserin : Mariuxi Shunta

Irutkamu: La Libertad

1.

Aents Auju najánaru nakumkata.

2.

¿Etsanu chikich aujmatma nékamek ? Unuimiatainiam etserkata.

3.

¿Warí takatna **Etsa, Shuaran jintia?**



Janch nuyá Iwia (*Pénker apújtai*)

Iwia aents tii uuntauyayi, kakaram shuara ma yuatsa wakeriniuyayi. Emkaka yajasma kampuniunmaya matan juarkimiayi ushu asa. Nuyá aentsun uchin nuyá uuntan juki yuta juarkimiayi. Uuntan taka pujan turutskesh eamutsa wun *Iwia* wainiak mankartiniuyayi.


Yajasma nuyá aents chichaman jusarmiayi *Iwian* amukartasa. Janch timiayi: «Wi yaintajrume wemtikratin» Etserin ainiawai *Iwia* uchin etsekeararmiayi nuyá chikichik shuarka wemramiayi, kayanam yaki wakar; nu kayaka tuke awai, Muruna Santiaknum. *Iwia* mashi wekamunam ajámiayi jacharijai. Janch kakarmauyayi *Iwian* jachari atanki waitkiasmiayi. Nuní shuar wemrarmiayi.

Janch ta *Iwia*: iniasmiayi «¿Warí pujuram?»
Iwia, kaya aja puja ainkiamiyi: «Tiranchi kaya
 ajakan aentsun akakeran yuataj tajai» tutai,
 Janch chichak:

«¡Wi yaintajme ajatan!» timia timiaya. Jachari
 juruki ajatan pujursamia timiaya. Janchka
 kaya aja ajamia timiaya. Janch *Iwia* chicharuk
 mai ikiuta sekemrujai aja ajatjai tutai, we
 menkakamia timiaya sekemrun jinium enkea
 asa, tuma ajai Janch jachari juruki tsekenmia
 tiniu ainiawai. Naintiar naintiar wesa entsa *Iwia*
 jachari ajunkamia timiaya. Tura *Iwian* chicharuk
 jui iniankai eat yainkiata tutai entsa ukuyatan
 pujursarmia timiaya.

Janch nuna turai, aents kayanam yaki eketainia nunka akaikiar wearmia timiaya. Janch, *Iwia* ataksha anankatsa jacharin entsa tii uuntnun ajapruamia timiaya. *Iwia* nekama Janchun matsa wakérulkmia timiaya aentsun yuachu asa. *Iwia* kajekmatai, janch seamia timiaya waker shitiaram mantuata tusa. Kajeku asa Janchun achik shitiatmajai, kayajai awaturata tutai Iwiaka imiatrusan amirak, janchka kaya nankiamun wemia timiaya. *Iwia* janchun matsa tujimnia tini ainiawai. Nuya shaurti winiaji *Iwinamaya* wemraitiji.

Etserin: Carlos Ikiam Rutkamu: San Francisco



**CHICHAM
IRUMRAMU**

Iwia. Aishman uunt, kakáram emka kampuniummaya yajasman nuyá aentsun yutan juarkimiayi. Etsa, nu kajekmajai Iwia mamiayi.

Sékemur. Arak ti kakaram nijiakamtai nupak saurin.

1. Apújsata X aujmatmanum tama nu.

Iwia jamu



Janch aentsun wemtikiui Iwian wishikiar



Iwia sekemrujai mamu

2.

Nakumkata Janch ikiurkamia aentsun wemtikiuk kayanam waka matsatun.

3.

Ame unuimiatairmin jimiárá unuikiartin inintrustá warí uruatsa natkait aents yaunchuya aujmataisha, imiánkaska Iwia, shuar pujutainiam. Aarta ayamu ame wakéramu.

.....
.....
.....
.....



Chicham jintiamu yajasmajai

Yaunchuya aujmatsamu ai, chicham jintiamu irunui yajasma kampuniunmaya tuya wininia. Nuya jintinkiatamu awai irutkamu shuar kampuniunmayajai írunu intianais pujusat tusar.

Yaunchuya aujmatsamu Etsa, Sésenkjai nuyá Tsekeancham (Pénker apújtai)

Etsa, Arútmauyayi nunka pujú nuyá aents tuke iwiaku pujú ati tusa najanatsa wakérukmiayi. Turak Sésenkan nuyá Tsekeanchman

Untukmiayi.

Sésenkan chicharuk naint nankaikim entsá jeam kaya mukusa itiartitiame timia timiaja. Tsekeanchmaka nuwe itiartitia tiniu timiaja

Sésenka ujumchik numi ajinkiari tentakni, nainiumani we ajá wekak waachu entsá jea kayan ejechmia timiaja. Tura Tsekeanchmaka nant nant jeá nuwe akai wakeketutakmia timiaja.

Etsa kayaná nakamia timiaja aentsu ukunchri irur najánatsa. Sésenk wau tachamtai ukunchin irur nuwejai najantramia timiaja. Tuma asamtai aentsti yamai jatainti.

Sésenk, Etsa aentsu najanar amikiu ai jeamiayi. Tuma asamtai Sésenkan yuminkramuyayi, nu yuminkian yamaisha entsakui. Sésenka mukusaiti patsenka kayaiti tuma asa yaitmataik wekainiaiti. Tura Etsa, Tsekeanchman chicharuk nant nant ajátin kajinmatkishtinaitme kampuniunam wekakun timia timiaja.

Etserin:

Benito Ujukam

Mariano Santiak

Irutkamu:

Chichis

Chichis



CHICHAM IRUMRAMU




Nuwe. Nuwe entsajai kutamar,takat najantai puju nuyá kapantaku.

Ukunch irurma.

Sésenk. Yajasma mukusa yaitias wekain.

Tsekeancham. Kashi wekain manchi.

1. Jintiata jintia Sésenk nuyá Tsekeancham aintraru
Etsan amirainiak



2. Sésenk nuyá Tsekeancham yakartá tura aujmatata aimjai urúkawarmia Etsa kayan nuyá nuwe susama.



3. Warí urukawayik Sésenk emka jeau asasha Tsekeanchamjaisha?

Jempe nuyá Yakakua (*Pénker apújtai*)

Jempe nuyá Yakakua chinki ainiawai, yaunchuka aents armiayi. Etserin ainiawai nuwa chichainiak takastarum ajami tutai, mai takautsa wu armia timija. Jempeka we warichik takas jea waketu ajauya timija tura Yakakuaka kiarai kaya akankeasa, juasa, naturusa jea jeauya timija. Nuwaka yakakuan wakerukarmia timija takauwiti tusar turuiniak nijianchin suiniak Jempenka entsachin suarmia timiahizo.


Nuwa chichainiak: «Jempe takatri yutai, urúatsan imia warish waketa »tiarmia timija. Jempe takatri jeawar nukap takasman wainkiarnia timija. Warichik Yakakua iiyuwarmia timija tura kaya jua puja wainkiarmia timija numinkia ajatsuk.

Nu tsawantin Jempe takatri wakerukar sunkipia nijiamchiri najanawar susarmia timija Turasha Jempeka entsachiri umarmia timija tura Yakakuaka neré yua janintias chichatan juarkimia tiniu ainiawai, ju chinkikia sue kapakuiti.

Jempe aratarum tutai wear arakmata amucharmiayi aja uunt ajaki wemiayi. Arakma amutan tujinkiar ikiukiarmiayi tura najanararmiayi chinki panknam nuyá yantsauchiniam.

Etserin : Benito Ujukam
Irutkamu: Chichis

1. Chikichkimsamu penkramunam nakumkata aujmatsu, timiatismek penker enkeata .aujmatsu.




2. Aimjai aujmatsatá, yaunchuya aents ajastasa wakerakmeka, ¿Yáki aintiam? ¿Uruamtai?

Aujmatma 3

¿Shuar warí takatna najana iwiaku pujustsasha?

Shuarka nunka aratniun,
eamtan, namak nijiatan,
waaka napampartin, ewejjai
najantaint nuyá numi
surutan pujurin ainiawai.



Shuarka wea jintiamun nuyá
yaunchuya aents ajumatai
jintiamun amirin ainiawai
arakmatniunam, eamkatniunam,
namak jiniatniunam nuyá
kampuntin iistinium.





!?

?!

AUJMATSATÁ

¿Warí takatna jeen shuar uchi najanena?

Shuarka nii arakmamuri surin
ainiawai surutainiam.

Shuara takatrinkia yapajniawiti
yamaiya juinkia.



Nunkui nuyá shuar nunka arakmatnum

Nunkui, nunká nukurinti nuwan jintiawai arakmatniun, ipiantratniun nuyá aja iistinian. Nunkui tsankaiti arakan nunkaya tsakamtikiuk. Nuwajai tsanias pujúwiti nuyá nekachtain arakmatna jintiniuiti aikiasan nantaran ikiustinian unuikiartiniaiti, kayaiti nantarka.

Nuwaka jintiamun amiachkunka Nunkui atankimniaiti tura yajá jukimniaiti. Tuma asamtai anéntrin ainiawai takamtachik Nunkui ajanam juakat tusa.

Yaunchuya ajmatai Nunkui

Yaunchu aents tsukai jinin ainia yurumak atsakui. Nuwaka entsa utukar wekain ainia, unkuch nukan kuiran juiniak yuawartasa. Tuma wekasar mama nuse saepe jakeki winian wainkar weankar nuwa wishiak tuak matsatun waintkiaru timiaja. Nuwaka mama pakarar, nusen nuyá inchin chankinium aimkiar saepnaka entsa ejekena timiaja.

Chikichik nuwa seamia timiaja maman, tura chicharuk uruamtain mamancha amastaj uchi penuarma tepana nu jukitia tiniu timiaja. Chicharuk penkesr iísta, awanip tu jintintia akupka timiaja, nuyásha

ame yurumatin seamtia amastatui tiarmia timiaja Nii yurumatniun seamuk juní titia tiniu timiaja «¡Warí ajak a! ¡Warí mamak turunku a! ¡Aja ipintramu a! ¡Nijiamanch a!»

Nuwaka yuminmas uchin penker iistajai ti jea waketki imiatrusan amikmia timiaja. Emkaka yurumkan iniarkamun nijiamchijai seamia timiaja, turam susamia timiaja. Juní, nii shuarjai yurumatniun takusaruya timiaja. Aishri inintrusmia timiaja uchisha tuya wainkiam tusa tura nii etseramia timiaja turunamuri.

Nuwa seamia timiaja aja turunku. Susamia timiaja. Aja ipintramun seamia timiaja, aikiasan susamia timiaja. Nunisan eamtanmasha nunkui mashi sumia timiaja.

Nuwa aishrijai ajanam maman ititsa wenak uchi penker iistarum tiniu timiaja uchiri ainian. Juarenaka uchi iniararmia timia mukuntain ati tusa. Wara warat juarkiar arum naiyap searmia timiaja, Nunkui muuké peamia timiaja atsa taman. Yajasma muuké seawarmia timiaja, amikchamia timiaja. Napin seawarmia timiaja nunasha atsa timia timiaja, turam utan pujursamia timiaja.

Uchi kajekar yukuimpiun jiinium utsantawarmia timiaja. Nunkui jea chairi wakamia timiaja utki juní nampemia timiaja: «Kenku kenku juruikia para nuse yu ajamij. Kenku kenku juruikia para nuse yu ajamij».

Tii kakar untsumki utan juarkimia timiaja Nayaim te ajas, mayaikia nase ajamia timiaja. Nuwaka ajanam puja Nunkuin enentaimtus warichik waketkimia timiaja. Jintianka numi tsaramkuri kakenak ajainiai

araka kampuniunmaya arak najanararmia timiaja. Panmaka winchu najanararmia timiaja, inchikia penke naek nuyá ajaka nupakmia tiniu ainiwai.

Kenkuka punuk jea chairi jeastatuk ajamia timiaj Nunkui pujamunam, tuma pujus kenkunam achimiak wayamia timiaja. Yaunchuka kenkuka wak, Nunkui akirki weak kenkuka turuj ekertar juakuiti.


Jea jeá uchin kakantrarmia timiaja kuntuts matsatun nuyá kenkun tsupitian juarkimia timiaja Nunkuin amayantasa. Tuma asa nunka kenkurtinkia arakmatin penkeraiti Nunkui pujak.

Nuyan Nunkui aentsun yuminramiyi nunka takakmas ara yurumatin tusa. Arakma yurumatsarki Nunkui anentruar seatniuiti.

Etserainia:

Benito Ujukam	Chichis
Enma Chumapi	Chichis
Juan Wampash	La Libertad
María Kayuk	La Libertad
Mariuxi Shuntak	La Libertad

Irutkamu:



CHICHAM IRUMRAMU



Kenku. Arak, micha nunkanmaya, numirijai tanishmatianti shuar jea.

Winchu. Panma antiaku, aya kukujrin neréchu.

Puju nuse. Nuse yumintri wakerukma.

Charap nuse. Nuse kapaku puju shait shait namu.

Naiyap. Yurank iwianch wakerutai shuara aujmatirijainkia.

Tuka. Nunka su neré yunkumtaku.

Unkuch. Arak ikiamia entsa tsukintri tsakau, nuké kuir yunkuna yutai. Tsukapnum etetai ti mejenin tusar.

Mama. Shuara arakri nukap arakri irunui. Kankapé yutai, nijiamanch najantai.

1. Nakumkata *Nunkui.urúkuit.*

2. Ju chicham akantra munam Nunkuiu aujmatma aentsu naari eaka.

M	U	C	H	I	K	N
U	N	U	K	A	P	U
T	U	I	Ñ	O	S	A
N	N	X	A	J	A	N
G	K	E	N	K	U	U
S	U	H	L	O	Z	W
M	I	J	E	R	E	A
A	R	L	P	E	W	M

3. ¿Enentaimsata, Nunkui jeemin jeamtai, Warín seamintiam? Urúamtai?
-
.....
.....
.....
.....
.....
.....
.....

4. Unuimiatainiam aujmatatá. ¿Shuar warí itiurawa ajanmaya arakan iwiaratsasha?



Ánent

Anentka untsumaiti nekáshma shuar najaniuti takatnum nuya intiainiawai nunka wainchatainiam. Ánent penke chichamnumia winiawai anentaim-ra (enentaimsatin, nekamatin) nuyá enentaiya.

Nuwa anemarar iniankain ainiawai anentan. Anent irunui nunka takakmastiniu, nuwe takat, yajasma tankumatin, mesetna nuyá eamat, anajmartin tura ii shuar jeachat puja enetaimtustin.

Chickich nampesmash shuarka achiakui ju ainiawai: nampet, ujaj, nuyá uwishin nampesma.



Ánent a Nunkui

Nunkui, nuwaitme tuma asam najanaruitme,
Nunkui anentruamtai nupa atsawai,
Untsuajme mama turumtiktsuk waitkiarsaim tusan,
Warawarat numin wajasan maman untsuajai,
Nampeamu anturtukam mama penker surusminiam tusan

Aní nampetainti. ;Antuktarum!
Aní yuruntainti, untsukar, nampsar.
Aní yurumjai ;Antuktarum!
Pantmancha Arutam amaji.

Nunkui, nuwaitme, tuma asam najanaruitme
Nunkui anentruamtai nupa atsawai,
Untsuajme mama turumtiktsuk waitkiarsaim tusan,
Nunkui, nuwaitme, tuma asam najanaruitme
Nunkui masticas y el monte no hay.
Warawarat numiniám wajasan maman untsuajai
Nampeamu anturtukam mama penker surusminiam tusan.

Etserainia: Irutkamu:
María Kayap La Libertad

1. ¿Nunkui warí seatain anentnumsha?


2. Emaksesam ejékata anentna.

¿Anent warimpiait?

¿Ya enentaimtusma ainia ámentcha?

¿Ya anentnasha jintinkiartin ainia?

¿Urúamtai áment arantutain?





Kaya antishtai

Shuar nunke antishtainiam kaya írunui kakarmari imianjai. Nantarka kaya ajánmayaiti arakan iniaiti, neremtikin tuma asamtaí nukua nawantri jintin ainiawai penker ikiustinan nuyá íistinian.

Namurka, uwishin ju ainiawai tsuakratkatsar, nuwa muspatin turutskesh eakmakin nuyá namakna. Kaya namura achiaku ju aminiati obsidiana, kaya sáar turutskesh chikich jiru pachimramu.

Namur nuyá nantar (Pénker apújtai)

Namur waimamu aniuiti nuya ayamkartiniaiti, yaunchuya uwishin achiaku armiayi wawek anumkain tusa. Namurka yajauch awatkartukminiaiti nuya mesemakminiaiti. *Namura* wainkiaka kakaram enentaimin armiayi nii shuarinkish yukartuamniaiti.

Nantarka ajánam waintainti nereniun penker ikuwiti ayamkartin asamtaí. Nantar yukartuawain tusar nuwa achikiar anentrua umpuin armiayi. Turamka yuminkiartichuyayi.

Etserainia: Ángel Chumbique

Irutkamu: Lawants



1. **Jintiata, ame chichamrumjai, warímpiait nantar.**

2. **Iísam aarta aents namura achiaku nuyá itiurawa.**

3. **¿Urúamtaí takustin nantar natkait shuarnuma?**



Eamat

Eamtaka yaunchuya shuar najánenawai timiatrusar nekamu apawach unuiniarma asar.

Eamat timiatrusa nekamu shuarnumka uumjai yajasma patatamu nüiti nuyá tijiuch ajasmatai tsentsakan tseasjai iwiaramun uumnum ekeawar umpuin ainiawai. Kuntin wanam pujakuinkia timpiam najanawar enken ainiawai. Ju uwínmanka eamkatsar iskuptian ju ainiawai.

Shuar aishman ju eamtanka najaniuiti nuyá irútkamunam nekamuiti. Chikichnumka nuwa eamtanam nemarniuiti.

Uum achitiae (Pénker apújtai)

Yaunchuka iskuptiaka utsumchataiyayi, uuntka uumjai chinki aunts, janch, pakin nuyá chikich kuntinian mau armiayi. Tsentsakan uumnium apujtusar kakar achikiar kuntinian kampuniunam wekasar kakar umpui mau armiayi.

Tsentsaka ijiu saepejai iwiarin armiayi nuyá tsakarnum tseasan apujtutainti nujai kuntinia matsar. Chankinian ju armiayi kuntin eamkamun enkea jukitniun.


Eamtanam yawá eamniuka nemauyayi, kashain nuyá pakin matsa.


Etserainia: Mariuxi Shuntak


Irutkamu: La Libertad



1. Nakumkata menaintiu tuntuitiai ame shuar eamkatsa utsuma
nuyá jintiata chikichkimsam itiurá tuntuitiaiin.







2. Enentaimsata yau yurumamu nuyá naari aarta eamkamu
tuyampait.

3. ¿Warinma metekchait eama yamaiya tura eama yaunchu
najantaijaiya?

4. ¿Wari eankamu wakeram? ¿Urúamtai?

Eamat irunin (Pénker apújtai)

Apar etserniuiti, yaunchuka, eamtaka tsukarmakur eamkar tutiyauyayi pujústasar. Kuntin eamtaikia ju armiayi waa, yunkits, kashai, paki nuyá shushui. Yawá jukiar eamutsa wu armiayi, wari kuntinia wainiut nuna naari juwiti, yawá kashairam, shushuiram, pakiram. Shushui eamkatsar washimtainti wanam, chinkikia tinkiamtainti.

Chinki kajentasar uum utsumtainti. Tsentsaka tsakari eamniuka tseasan apujtinaiti, juka tseas nupajai kuta najanar iwiartainti natema aintsan. Kunkunti najamin ain tusar chirichijai apujtutainti. Tsentsak tseasjai tukumuka jeachat kampuniunam we jawiti nuyá jeachat jakamtai tseas mejeakui nekar waintiauyayi.

Etserainia: Ángel Chumbique

Irutkamu: Lawants

1. Eamat anairatá aujmatmanum etserma.

2.

¿Urúamtaí shuar yawá nemartusat tusa wakerinaiat eamanum?

3.

Emamkesa ejékata yawá eamin nékamuram papich aarmanum.

Naa:

Naa nereniuri:


Ukujtiurma:

Yajasma eamin:

Nakunkamu yawa

Eakmat najantai

Eakmatka takataiti eakmaun timiant awajeawai. Yaunchu eamutat tusar natsaka tsankun ijurawar mushutin armiayi kuntutnarmit tusar. Tsanmamunam wea jintin armiayi nampernaka.



Yamaiya eamat (*Pénker apújtai*)

Yamaikia kampuniunam chinkikia menkarait. Yaunchuka irúniuyayi kawá, nuyá yurank nerekaru. Yamaikia chinki shiakuiti numi ajátram, tsupir suramu asa. Tuma asa eamtaka menakuiti kampuniunam kuntin atsak. Yawajai kashai, yunkits, shushui ya neashma paki wainiakminiaiti. Pakikia nujatia pakanam kaunin armiayi aikiasan numi ajatran menkaraiti.

Etserainia: Benito Ujukam

Irutkamu: Chichis

1. Eaktá ame irutkamurmin tsank nampermatai najantaikiai.
Unuimiatainiam etserkatá ame eakma.
2. ¿Warí uruamtai menakuit eamtasha?

3. Chicham akatmama aarta aents yawi mukusanam takakmainia turutskesh numin ajainia shuar eamat menakain.



Namak nijiat

Shuarna chikich takat yaunchuya takatai namak nijiatitai, ju najankur *timiu* nekenkar namak matainti turar yupichuch jutainti washimiar. Junumka aishman, nuwa nya uchish pachintin ainiawai.

¿Itiur namak nijiatain?

Namaka juní nijiatainti. Emkaka *timiu* tautainti nuyá entsa nijiatniunam. jutainti. Namak enkemat tusar washim apujtainti penker nukú nukúrusar shiakain tusar nuyá *timiu* neket juartainti, chankinium jutainti nijiatnsar. Aentska sukun chankinian jukitniuiti namaka juktasa, nijiamatniunam jeawar nijiau ainiawai. Namaka nijia aminiak washimnumia ju ainiawai nuyá jea waketen ainiawai. Yunkunawartasa pumpú nuken juuk iniarin ainiawai. Iniarkar yurumkajai namakan yuawar nijamchin umin ainiawai.

Etserainia: Ángel Chumbique



Irutkamu: Lawants

CHICHAM
IRUMRAMU



Chankin. Enkear entsatai. Naekjai najanamu.

1. Jintiata nakumkan shuar warí takatna najaniuit namaka nijiamatsa weak.



2. Aimjai nakurusta. Namaka naari nukap nekan titia 30' etsa akankamuch. Nukap anaiyaka awakmawai.



Ewejai najantai

Ewejai najantai takakmainiak, shuarka kaentramujai, araknajai yakatai, araka neré, chini mikiarí nuyá naikijiai takakmau armiayi, juka kampuniunmaya jutainti.

Nuwaka muitsan takau armiayi nuyá chikich takat nuwejai najantain. Aishmanka sukon nuyá uruchin kutamin armiayi pushi entsartinian najanatniun. Ju takatka apa, nuku nuyá uchi jimiarin armiayi najantain imiatrus neká yaunchu shuara najantairi takusarat tusa.

¿Itiurá Chankin jetain? (Pénker apújtai)

Chankín jet najankur nunkania juartainti. Ju takatnaka aishman najanin ainiawai, nuwa najaniush irunui. Chankinkia makaya jiurijai jetainti, juka naek ésarmaiti. Aishmanka ti tsawant pujurcha ainiawai chankinia jenak, kiarai ayamenak takau ainiawai. Chankinkia yurumak nuyá pantam jukitniunam utsumtainti.

Etserainia: Enma Chumapi

Irutkamu: Chichis

1.

Aarta menaintiu iniakma chankin itiurka najantain.

2.

¿Yamai chankin warinma utsumtain?

3.

¿Warimpia ewejaisha najanuitiam? Ya unuitiamramia najanatniun? Warinma utsumtain?

Aujmatma 4

Yauchuya
tsuakratin: uwishin,
Tsuakratinnuyá
antishtai arak

Shuarka nankamas
sunkurnaka uwishi
tsentsakjai waekratamu
tiniu ainiawai.



Emka shuar tsentsakratniuka
Tsunkiti entsá pujú.



Arak antishtai kakármari nékamuka
natemaiti , natkaiti tsuakratin
ajástinium. Shuarka ju araknaka uchiri
penker pujustinian tusa utsumniuiti.

Yaunchuya
tsuakratniuka
nankamas tsentsakan
achiaku awiti. Mai
íimiastinian ainiaawai
ayamrumakarta.

Yaunchuya
tsuakratniuka
nankamas tsentsakan
achiaku awiti. Mai
íimiastinian ainiaawai
ayamrumakarta.

AUJMATSATÁ

¿Yaunchuya tsuakratin ame irutkarmin
warínia najánin ainia uchi jakuisha?

¿Yauchuya tsuakratin itiura iwiarnau ainia: uwishin nuyá Tsuakratin?

(Pénker apújtai)

Menaintiu nawe yarush uwí unuimiatramiajai tsuakratin ajastasan. Yamaikia ujuk nawe usumtai uwí achiakjai. Winia apachruka Yankuraiti, nateman iniarak umpuar suriniuyayi ani unuimiatramiajai. Chikich uwishniuncha nemarsaruitjai iturá jan tsuaraintiaj tusan.. Ujuj uwishin unuitiuraruítia, nankamas yurunkam yuchauyajai, ayatik paanman, tsama namukma. Chikichki, jimiárá nantu aní pujumiajai, nuyá arumai nateman iniarkan jea uminiuyajai. Natem umárikia we nekaptainti mashi iímtainti.

Natem umut unuimiarikia jash iísminiaiti, tsentsaka úwí jankiria anin jiniuiti chikich uwishin umpuakui . Natem umarikia micha nekaptainti ayashnum nuyá numpanam.

Jaka najaimiamunam mukutar tsuatainti. Entsa kunkuinjai florida naartin usuktainti muuknum nuyá shishinjai awajtutainti ashí ayashnum. Tura najamamuka menkainiaiti, tsuartasrikia natem nukap umartiniaiti. Micha nunka Quito jurukiarmiayi nuwa natsan mayai ishiniun tsuarat Wawek sunkurnaka tsuaminiaitjai, chikich sunkurnaka tsuarchamniaitjai, apach uwishniusha tii janka tsuachuiti. Nuwasha uwishin írunui tsuakratin, apach nua tsuakratin aitkiasan

Yamaikia nateman umarchamniaitjai jakun takaschamniaitjai yauchua aní, chikich jintian pujurjai. Arútma enetaimtin evangelista-itjai. Wakerakun uminiaitjai waweamun tsuartasan , kuntuts pujancha

Etserin: Martín Tentets

Irutkamu: Chichis

CHICHAM
IRUMRAMU



Tsamá tuimiamu: Yauchuya umutai, paantam tsamaku iwiartainti.

Tsentsak. Uwishin utsumin ainia wawekratas, aya uwishniuk wainkiamniaiti

1. Warinia utsumniuit uwishin tuyá Tsuakratin takakmastasa?



2. ¿Itiurá iwiarnawit aents uwishin ajástasa?

3. Uwishin irasukaitiam? Etserkata lísá nekamuram.

4. ¿Uwishin urúatsa imia natka ainiat irutkamurminia?

Antishtai arak

Shuarka antishtai arakan utsumin ainiawai pujamurin. Tumaitkiusha arak nekachtairi irunui, aya uwishin nuyá Tsuakratin nekainiawai nuyá yajauchin netemtikniuti, tsuakraturtinian nuyá ikiakarturtinia.

Natem (Pénker apújtai)

Natemka wakan itia aniuiti, epemir ikratainti. Umarar we nekaptainti, napi waintainti, yajasma, kakáram nekapea uminiaiti. Aents tiniu ainiawai nuwasha natemnaka úminiaiti anajmarmari nekatsa. li wakeramuri waintainti.

Yaunchu enetajiaikia, shuar jakamtai natem umutainti imiasar kajinmatkitsar warinkish turunamu, turakur imiutainti. Imiakur yajauch waitsamu mashi ajaptainti. Wi chikichki umarmiajai kajekan, wi shuar jakamtai itiurak pujá, yaki mama, waweama tusan iistasan wakerukmiajai. Penké wainkishmiajai. li apari ikiakartaj uchirun tauka nateman suwiti.

Etserin: Víctor Carrión

Irutkamu: Sakants





CHICHAM IRUMRAMU



Natem. Arak nampemkartikin, nekamatain ikiajin, iímkiartikin. Kichwaka l ayahuasca naartinjai nekamuiti.

1. Irutkamurmin, ¿ya nateman uminiait turutskesha chikich antishtai arakna? ¿Urúamtai utsumtai?

2. Nakumkan nuyá aarta chikich antishtai araka naari nékamuram.



3. Aujmatsata ame airmejai ayamu akantsam. Warí urukawaintiuk ju ...

Antishtai arak kampuniunam atsawai.

Mashi uwishin nuyá Tsuakratin apach
matsamtainiamunam pujútsa wearainti.

Chikichki tsawant ame wakeramu
antishtai arak natem naartin wakéramu
íimtikramsainti.

Aujmatma 5

Shuar ijiamtutai

Ijjiamtamuka nankamas
tsawantin nuyá tuinkish
shuar irutkamunam
najantainti.





Ijiamtakur yaunchuya najankur ii enentaimiari ikuji tuke
atín tusar nunka pujamunam.



AUJMATSATÁ

¿Irutkamurmincha warí ijiamtiniaitrum?
¿Pachintiuakaitiam?

Ijiamtamuka, yurumak nuyá
umartin nukap awiti. Nuwa
nijiamchinkia iwiarniuiti nuyá
aishmanka eamutsa wu ainiawai
yurumatniun.



Napi ijiamtamú

Ju ijiamtamuka aents napi esaimiu tsuamaru najatainti. Ju nampera emtaka napi esaimu atiniaiti.

Tsawamunam, etsa menaint ekemsamunam juartainti. Aents napi esaimiu ka kutanknum ekemniuiti misú. Aents irutkamunmaya tentemau ainiawai, emtaka aentsun mitiamtkniuiti napi matsa. Wakemesent enentaimtusar najanchakrikia napi awainki esaimniaiti turutskesh janakmniaiti. Juna jintia kaya jinkia anunkniuiti nuyá tawai: «makanchi muuké jinkiaj», mashi awainki tuiniawai «jsas!». Emtak suajai suau ainiawai napi aní yapiniam apujtusainti nuyá napi naari anaitainti: «Wanka napi, Kaka napi, Ipiak napi, Secha napi, Sua napi, Purutskam, Muash, Titink, Yamunk, Shukem, Chichi, Wayas, Namakrunch, Wapu napi» Kaya jinkia panma nari amutinianiti nuyá napin nakumtin ainiawai napi esaimiu iyashin.

Napi naari anair amukar, mashi pujuinian ipiau ainiawai panma nari napi aikiamun amutuawarat tusa turawar napi wakani main ainiawai. Tura pachintiunka suajai yakatainti. Tura amikiar aents napi esaimiu matsatmanun pachin ainiawai. Atash iwiaruman su ainiawai nuyá sanku nijiamchiri umutainti. Pachintiuniaka yurumin ainiawai, turachmaka napi esatminiaiti. Arum jintia uriki wawakri nuyá weeknumsha naman apujtusar akuptainti kampuniunam napin jampermamun etserkat tusa. Napimiamuka tsawant ujuk ekemsamunam amunainiaiti tura pachinkiaruka jeen waketin ainiawai.

Etserku:

Manuel Antuash
Víctor Carrión

Irutkamu:

San Francisco de Ikiam
Sakants

**CHICHAM
IRUMRAMU**



Sanku. Yutai, Ikiam aram tsapau.

Sua. Nere, intiashi iwiarin nuyá iyashin mukusa awajin.

1. ¿Napimiamu warinia iniakma tarimiats shuarnumsha?

2. Nawe, napi naari nékamu aarta.

3. Ame aimjai iniakmasta napimiamu nuyá jintiata natkari.



Uwí ijiamtutai

Uwí juakur ju namperka Shuar imiankaska tuntiak nantutin najanin ainiawai. Namperka chikichki kashi pujurtainti, uwí arakri, nuyá jukmatai nampertainti.

¿Itiúra uwí jiniamchiri najantain? (Pénker apújtai)

Uwí nijiamchirinkia tuntiak nantutin najantainti. Uwí nijiamchiri iwiaratsarka uwí neré tsamaku ewej turutskesh ujuk chankin nukap jutainti. Kashí tsawarar neré jukar, iniarkar nuyá penker nautainti. Nuya ichinkian nukurar, jea ajaperi apujtainti. Wikiartin Jiniamchiniam numich apujtainti nuyá kashi jantsemtaka juarnawiti uwí naari.

Nukúa, nawan, nukuach nuyá tirank uwín namperin ainiawai nijiamchiri kuta ajasmatai.

Etserku:

Manuel Antuash

Pedro Tentets

Irutkamu:

San Francisco

1.

Uwí ijiamtamunam pachintiuamuram enentaimsata nuyá ju aníntramu aimkiata:

¿Uruámtai uwisha ijiamtutain?

¿Nampernumsha warjai iwiarmatlain?

¿Itiúra, uchi ame uwí achiaku ijiamtamuncha pachintin ainia?

Tsantsa ijiamtutai

Ju ijiamtutka yaunchu irutkamu shuarnum ijiamtutai ayayi, yumasri mawar meseta pachintiuawaru muken tsupikiar tsantsan ijiamtin armiayi, jaká wakaní ikmak mankartuawain tusa.

Tsantsa najana amikiar namperan juarin armiayi, juka ujajmau armiayi, mesetan pachintiuan wainiainiak. Jantsemanum tsantsa wakaní kakarmari iniankatin armiayi mankartinia nuwa shuarin takatnum taramka ati tusar.

Shuar meseten pachintiua nuyá tsantsa (Pénker apújtai)

Ti yaunchu uwí, uunt, shuaran mau, muukén tsupirkar aesin armiayi. Tsantsa ijiamat juartsuk, nuwa nijiamchin iwiarainiai, aishmanka eamutsa wu armiayi. Kashikia tsantsan tentemrúa jantsemin armiayi. Winia apar Martín Ujukam turamiayi. Meseten pachintin ayayi, Nankaisnum aents itit awajeam; arantkartin ayayi nuyá chickich meseten pachintiuka awakchatai ayayi. Aents ishiamainiak, Numpatkaim, Piruanum pujutsa shiakarmiyai.

Etserku: Martín Tentets

Irutkamu: Chichis



1. **Tsantsa ijiamtamú pachintiua enentaimiu ajata. ¿Warí wainiam? ¿Wrí nekapeam? ¿Warí najaneam? ¿Ya ijiamta emta? ¿Ya pachintiunia?**

Nakumkata enentaimsamna nu.

2. **Aimjai aujmatsatá. ¿Tsantsa ijiamtamusha uruamtai natkauya Shuarnumsha?**